

四庫全書

史部

欽定四庫全書

史部

通志卷一百二十九

上下

詳校官編修_臣李潢

編修_臣裴謙覆勘

覆校官助教_臣金學詩

校對官學正_臣徐立綱

謄錄貢生_臣黃嵩齡

欽定四庫全書卷

通志卷一百二十九上

宋右迪功郎鄭樵漁仲撰

列傳第四十二上

晉

王羲之

子元之凝之徽之獻之徽之子楨

王遜

蔡豹

羊鑒

劉允

桓宣

族子伊

朱伺

毛寶

子穆之

安之

孫璩宗人德祖

劉遐

鄧嶽

子遐

朱序

陳壽

王長文 虞溥 司馬彪 王隱 虞預 孫盛

干寶 鄧粲 謝沉 習鑿齒 顧和 袁瓌

子喬 喬孫山松 瓌弟猷 瓌從祖準 準孫耽 耽子質 江逌 從弟灌 灌子績 車允

殷覬 王雅 王恭 庾楷 劉牢之 殷仲

堪 楊佺期 劉毅兄邁 諸葛長民 何無忌 檀

憑之 魏詠之

王羲之字逸少司徒導之從子也祖正尚書郎父曠淮南太守元帝之過江也曠首創其義羲之幼訥於言人

未之奇年十三嘗謁周顓顓察而異之時重牛心炙坐
客未噉顓先割噉義之於是始知名及長辯贍以骨鯁
稱尤善隸書為古今之冠論者稱其筆勢以為飄若遊
雲矯若驚龍深為從伯敦導所器重時陳留阮裕有重
名為敦主簿敦常謂義之曰汝是吾家佳子弟當不減
阮主簿裕亦目義之與王承王悅為王氏三少時太尉
郗鑒使門生求壻於導導令就東廂徧觀子弟門生歸
謂鑒曰王氏諸少並佳然聞信至咸自矜持唯一人在

東牀坦腹食獨若不聞鑒曰正此佳壻邪訪之乃羲之也遂以女妻之起家秘書郎征西將軍庾亮請為叅軍累遷長史亮臨薨上疏稱羲之清貴有鑒裁遷寧遠將軍江州刺史羲之既少有美譽公卿皆愛其才器頻召為侍中吏部尚書皆不就復授護軍將軍又推遷不拜揚州刺史殷浩素雅重之勸使應命乃遺羲之書曰悠悠者以足下出處足觀政之隆替如吾等亦謂為然至如足下出處正與隆替對豈可以一世之存亡必從足

下從容之適幸徐求衆心卿不時起復可以求美政不
若豁然開懷當知萬物之情也義之遂報書曰吾素自
無廊廟意王丞相時果欲內吾誓不許之手跡猶存由
來尚矣不於足下參政而方進退自兒娶女嫁便懷尚
子平之志數與親知言之非一日也若蒙驅使關隴巴
蜀皆所不辭吾雖無專對之能直謹守時命宣國家威
德故當不同於凡使必令遠近咸知朝廷留心於無外
此所益殊不同居護軍也漢末使太傅馬日磾慰撫關

東若不以吾輕微無所為疑宜及初冬以行吾惟恭以待命義之既拜護軍又苦求宣城郡不許乃以為右將軍會稽內史時殷浩與桓溫不協義之以國家之安在於內外和因與浩書以誠之浩不從及浩將北伐義之以為必敗以書止之言甚切至浩遂行果為姚襄所敗復圖再舉又遺浩書曰知安西敗喪公私惋怛不能須臾去懷以區區江左所營綜如此天下寒心固以久矣而加之敗喪此可熟念往事豈復可追願思弘將來令

天下寄命有所自隆中興之業政以道勝寬和為本力
爭武功作非所當因循所長以固大業想識其由來也
自寇亂以來處內外之任者未有深謀遠慮括囊至計
而疲竭根本各從所志竟無一功可論一事可紀忠言
嘉謀棄而莫用遂令天下將有土崩之勢何能不痛心
悲慨也任其事者豈得辭四海之責追咎往事亦何所
復及宜更虛已求當與有識共之不可復令忠允之言
常屈於當權今軍破於外資竭於內保淮之志非復所

及莫過還保長江都督將各復舊鎮自長江以外羈縻而已任國均者引咎責躬深自貶降以謝百姓更與朝賢思布平政除其煩苛省其賦役與百姓更始庶可以允塞羣望救倒懸之急使君起於布衣任天下之重尚德之舉未能事事允稱當董統之任而敗喪至此恐闔朝羣賢未有與人分其謗者今亟修德補闕廣延羣賢與之分任尚未知獲濟所期若猶以前事為未工故復求之分外宇宙雖廣自容無所知言不必用或取怨執

政然當情慨所在正自不能不盡懷極言若必親征未
達此旨果行者愚智所不解也願復與衆共之復被州
符增運千石徵役兼至皆以軍期對之喪氣罔知所厝
自頃年割剥遺黎刑徒竟路殆同秦政惟未加參夷之
刑耳恐勝廣之憂無復日矣又與會稽王賤陳浩不宜
北伐并論時事曰古人恥其君不為堯舜北面之道豈
不願尊其所事比隆往代況遇千載一時之運顧智力
屈於當年何得不權輕重而處之也今雖有可欣之會

內求諸已而所憂乃重於所欣傳云自非聖人外寧必有內憂今外不寧內憂以深古之弘大業者或不謀於衆頃國以濟一時功者亦往往而有之誠獨運之明足以邁衆暫勞之弊終獲永逸者可也求之於今可得擬議乎夫廟算決勝必宜審量彼我萬全而後動功就之日便當因其衆而即其實今功未可期而遺黎殲盡萬不餘一旦千里饋糧自古為難況今轉運供給西輸許洛北入黃河雖秦政之弊未至於此而十室之憂便以

交至今運無還期徵求日重以區區吳越經緯天下十分之九不亡何待而不度德量力不弊不已此封內之所以痛心歎悼而莫敢吐誠往者不可諫來者猶可追願殿下更垂三思解而更張今殷浩荀羨還據合肥廣陵許昌譙郡梁彭城諸軍皆還保淮為不可勝之基須根立勢舉謀之未晚此實當今策之上者若不行此社稷之憂可計日而待安危之機易於反掌考之虛實著於目前願運獨斷之明定之於一朝也地淺而言深豈

不知其未易然古人處閭閻行陣之間尚或干時謀國
評裁者不以為譏況厠大臣末行豈可默而不言哉存
亡所係決在行之不可復持疑後機不定之於此後欲
悔之亦無及也殿下德冠宇內以公室輔朝最可直道
行之致隆當年而未允物望受殊遇者所以寤寐長歎
實為殿下惜之國家之慮深矣常恐伍員之憂不獨在
昔麋鹿之游將不止林藪而已願殿下暫廢虛遠之懷
以救倒懸之急可謂以亡為存轉禍為福則宗廟之慶

四海有賴矣時東土饑荒義之輒開倉賑貸然朝廷賦役繁重吳會尤甚義之每上疏爭之事多見從又與尚書僕射謝安書曰頃所陳論每蒙允納所以令下小得蘓息各安其業若不爾此一郡久以蹈東海矣今事之大者未布運漕是也吾意望朝廷可申下定期委之所司勿復催下但當歲終考其殿最長吏尤殿命檻車送詣天臺三縣不舉二千石必免或可左降今在疆塞極難之地又自吾到此從事常有四五兼以臺司及都水

御史行臺文符如兩倒錯違背不復可知吾又瞑目循
常推前取重者及綱紀輕者在五曹主者蒞事未嘗得
十日吏民趨走功費萬計卿方任其重可徐尋所言江
左平日揚州一良刺史便足統之況以羣才而更不理
正由為法不一牽制者衆思簡而易從便足以保守成
業倉督監耗盜官米動以萬計吾謂誅翦一人其後便
斷而時意不同近檢校諸縣無不昏爾餘姚近十萬斛
重斂以資官吏令國用空乏良可歎也自軍興以來征

役及充運死亡叛散不反者衆虛耗至此而補代循常所在凋困莫知所出上命所差上道多叛則吏及叛者席卷同去又有常制輒令其家及同伍課捕課捕不擒家及同伍尋復亡叛百姓流亡戶口日減其源在此又有百工醫寺死亡絕沒家戶空盡差代無所上命不絕事起或十年十五年彈舉獲罪無懈怠而無益實事何以堪之謂自今諸死罪原輕者及五歲刑可以充此其減死者可長充兵役五歲者可充雜工醫寺皆令移其

家以實都邑都邑既實是政之本又可絕其亡叛不移其家逃亡之患復如初耳今除罪而充雜役盡移其家小人愚迷或以為重於殺戮可以絕姦刑名雖輕懲肅實重豈非適時之宜邪義之雅好服食養性不樂在京師初渡浙江便有終焉之志會稽有佳山水名士多居之太傅謝安未仕時亦居焉孫綽李充許詢支遁等皆以文義冠世並築室東土與義之同好嘗與同志宴集於會稽山陰之蘭亭義之自為之序以申其志曰永和

九年歲在癸丑暮春之初會于會稽山陰之蘭亭修禊
事也羣賢畢至少長咸集此地有崇山峻嶺茂林修竹
又有清流激湍映帶左右引以為流觴曲水列坐其次
雖無絲竹管絃之盛一觴一詠亦足以暢叙幽情是日
也天朗氣清惠風和暢仰觀宇宙之大俯察品類之盛
所以游目騁懷足以極視聽之娛信可樂也夫人之相
與俯仰一世或取諸懷抱悟言一室之內或因寄所託
放浪形骸之外雖趣舍萬殊靜躁不同當其欣於所遇

暫得於已快然自足不知老之將至及其所之既倦情
隨事遷感慨係之矣向之所欣俛仰之間以為陳迹猶
不能不以之興懷況修短隨化終期於盡古人云死生
亦大矣豈不痛哉每覽昔人興感之由若合一契未嘗
不臨文嗟悼不能喻之於懷固知一死生為虛誕齊彭
殤為妄作後之視今亦猶今之視昔悲夫故列叙時人
錄其所述雖世殊事異所以興懷其致一也後之覽者
亦將有感於斯文或以潘岳金谷詩序方其文義之比

於石崇聞而甚喜性愛鷺會稽有孤居姥養一鷺善鳴
求市未能得遂攜親友命駕就觀姥聞義之將至烹以
待之義之歎惜彌日又山陰有道士養好鷺義之往觀
焉意甚悅固求市之道士云為寫道德經當舉羣相贈
耳義之欣然寫畢籠鷺而歸甚以為樂其任率如此嘗
詣門生家見梨几滑淨因書之真草相半後為其父誤
刮去之門生驚懊者累日又嘗在叢山見一姥持六角
竹扇賣之義之書其扇各為五字姥初有慍色因謂姥

曰但言是王右軍書以求百錢邪姥如其言人競買之
他日姥又持扇來羲之笑而不答其書為世所重皆此
類也每自稱我書比鍾繇當抗行比張芝草猶當鴈行
曾與人書云張芝臨池學書池水盡黑使人耽之若是
未必後之也羲之書初不勝庾翼郝愔及其暮年方妙
嘗以章草答庾亮而翼深歎伏因與羲之書云吾昔有
伯英章草十紙過江顛狽遂乃亡失嘗嘆妙迹永絕忽
見足下答家兄書煥若神明頓還舊觀時驃騎將軍王

述少有美譽與義之齊名而義之甚輕之由是情好不
協述先為會稽以母喪居郡境義之代述止一弔遂不
重詣述每聞角聲謂義之當候已輒灑掃而待之如此
者累年而義之竟不顧述深以為恨及述為揚州刺史
將就徵周行郡界而不過義之臨發一別而去先是義
之常謂賓客曰懷祖正當作尚書耳投老可得僕射更
求會稽便自邈然及述蒙顯授義之恥為之下遣使詣
朝廷求分會稽為越州行人失辭大為時賢所笑既而

內懷愧嘆謂其諸子曰吾不減懷祖而位遇懸邈當由
汝等不及坦之故邪述後檢察會稽郡辨其刑政主者
疲於簡對義之深恥之遂稱疾去郡於父母墓前自誓
曰維永和十一年三月癸卯朔九日辛亥小子義之敢
告二尊之靈義之不天夙遭閔凶不蒙過庭之訓母兄
鞠養得漸庶幾遂因人乏蒙國寵榮進無忠孝之節退
無推賢之義每仰詠老氏周任之誠常恐斯亡無日憂
及宗社豈惟微身而已是用寤寐永歎若墜深谷止足

之分定之於今謹以今月吉辰肆筵設席稽顙歸誠告
誓先靈自今之後敢渝此心貪冒苟進是有無尊之心
而不予也子而不予天地所不覆載名教所不得容信
誓之誠有如皦日義之既去官與東土人士盡山水之
遊弋釣為娛又與道士許邁共修服食採藥石不遠千
里徧遊東中諸郡窮諸名山泛滄海歎曰我卒當以樂
死謝安嘗謂義之曰中年以來傷於哀樂與親友別輒
作數日惡義之曰年在桑榆自然至此頃正賴絲竹陶

寫常恐兒輩覺損其歡樂之趣朝廷以其警告亦不復徵之時劉惔為丹陽尹許詢嘗就惔宿牀帷新麗飲食豐甘詢曰若此保全殊勝東山惔曰卿若知吾山由人吾安得保此羲之在坐曰令巢許遇稷契當無此言二人並有愧色初羲之既優游無事與吏部郎謝萬書曰古之辭世者或被髮陽狂或污身穢跡可謂艱矣今僕坐而獲逸遂其宿心其為慶幸豈非天賜違天不祥頃東遊還脩植桑果今盛敷榮率諸子抱弱孫游觀其間

有一味之甘割而分之以娛目前雖植德無殊邈猶欲
教養子孫以敦厚退讓或有輕薄庶令舉策數焉彷彿
萬石之風君謂此何如比當與安石東游山海并行田
視地利頗養閑暇衣食之餘欲與親知時共懽讌雖不
能興言高詠銜杯引滿語田里所行故以為撫掌之資
其為得意可勝言邪常依依陸賈班嗣楊王孫之處世
其欲希風數子老夫志願盡於此也万後為豫州都督
又遺万書誡之曰以君邁往不屑之韻而俯同羣碎誠

難為意也然所謂通識正當隨事行藏乃為遠耳願君
每與士之下者同則盡善矣食不二味居不重席此復
何用而古人以為美談濟否所由實在積小以致高大
君其存之万不能用果敗年五十九卒贈紫金光祿大
夫諸子遵父先旨固讓不受有七子知名者五人元之
早卒次凝之亦工草隸仕歷江州刺史左將軍會稽內
史王氏世事張氏五斗米道凝之彌篤孫恩之攻會稽
僚佐請為之備凝之不從方入靖室請禱出語諸將曰

吾已請大道許鬼兵相助賊自破矣既不設備遂為恩
所害凝之弟徽之字子猷性卓犖不羈為大司馬桓溫
叅軍蓬首散帶不綜府事又為車騎桓冲騎兵叅軍冲
問卿署何曹對曰似是馬曹又問管幾馬曰不知馬何
由知數又問馬比死多少曰未知生焉知死嘗從冲行
值暴雨徽之因下馬排入車中謂冲曰公豈得獨擅一
車冲嘗謂徽之曰卿在府日久比當相料理徽之初不
酬答直高視以手版拄頰云西山朝來致有爽氣耳時

吳中一士大夫家有好竹欲觀之便出坐輿造竹下諷
嘯良久主人灑埽請坐徽之不顧將出主人乃閉門徽
之便以此賞之盡懽而去嘗寄居空宅中便令種竹或
問其故徽之但嘯詠指竹曰何可一日無此君邪嘗居
山陰夜雪初霽月色清朗四望皓然獨酌酒詠左思招
隱詩忽憶戴逵逵時在剡便夜乘小船詣之經宿乃至
造門不前而返人問其故徽之曰本乘興而行興盡而
返何必見安道邪性放誕好聲色嘗與弟獻之共讀高

士傳讚獻之賞并丹高潔徽之曰未若長卿慢世也其
傲達如此時人皆欽其才而穢其行後為黃門侍郎棄
官東歸與獻之俱病篤時有術人云人命應終而有生
人樂代者則死者可生徽之謂曰吾才位不如弟請以
餘年代之術者曰代死者以已年有餘得以足亡者耳
今君與弟算俱盡何代也未幾獻之卒徽之奔喪不哭
直上靈牀坐取獻之琴彈之久而不調歎曰嗚呼子敬
人琴俱亡因頓絕先有背疾遂潰裂月餘亦卒子楨之

字公幹歷位侍中大司馬長史桓元為太尉朝臣畢集
問楨之我何如君亡叔在坐咸為氣咽楨之曰亡叔一
時之標公是千載之英一坐皆悅徽之弟操之字子重
歷侍中尚書豫章太守操之弟獻之字子敬少有盛名
而高邁不羈雖閑居終日容止不怠風流為一時之冠
年數歲嘗觀門生擣菹曰南風不競門生曰此郎亦管
中闕豹時見一班獻之怒曰遠慙荀奉倩近愧劉真長
遂拂衣而去嘗與兄徽之操之俱詣謝安二兄多言俗

事獻之寒溫而已既出客問安王氏兄弟優劣安曰小者佳客問其故安曰吉人之辭寡以其少言故知之嘗與徽之共在一室忽然大火發徽之遽走不遑取履獻之神色怡然徐呼左右扶出夜卧齋中而有偷人入其室盜物都盡獻之徐曰偷兒青氈我家舊物可特置之羣偷驚走工草隸善丹青七八歲時學書義之密從後掣其筆不得歎曰此兒後當復有大名嘗書壁為方丈大字義之甚以為能觀者數百人桓溫嘗使書扇筆誤落

因畫作烏駝犢牛甚妙起家州主簿祕書郎轉丞以選
尚新安公主嘗經吳郡聞顧辟彊有名園先不相識乘
平肩輿徑入時辟彊方集賓友而獻之游歷既畢傍若
無人辟彊勃然數之曰傲主人非禮也以貴驕士非道
也失是二者不足齒之傖耳便驅出門獻之傲如也不
以屑意謝安甚欽愛之請為長史安進號衛將軍復為
長史太元中新起太極殿安欲使獻之題榜以為萬代
寶而難言之試謂曰魏時陵雲殿榜未題而匠者誤釘

之不可下乃使韋仲將懸橙書之比訖鬚鬢盡白裁餘
氣息還語子弟宜絕此法獻之揣知其旨正色曰仲將
魏之大臣寧有此事使其若此有以知魏德之不長安
遂不之逼安又問曰君書何如君家尊答曰故當不同
安曰外論不爾答曰人邠得知尋除建威將軍吳興太
守徵拜中書令及安薨贈禮有異同之議惟獻之與徐
邈其明安之忠勲獻之復上疏叙安功績孝武帝遂加
安殊禮未幾獻之遇疾家人為上章道家法應首過問

其有何得失對曰不覺唯憶與郝家離婚獻之前妻郝
曇女也俄而卒於官安僖皇后立以后父追贈侍中特
進光祿大夫太宰謚曰憲無子以兄靜之嗣位至義興
太守時議者以為義之草隸江左中朝莫有及者獻之
骨力遠不及父而頗有媚趣桓元雅愛其父子書各為
一表置左右以翫之始義之所與共遊者許邁邁字叔
元一名映丹陽句容人也家世士族而邁少恬靜不慕
仕進未弱冠嘗造郭璞璞為之筮遇泰其上六爻發璞

謂曰君元吉自天宜學升遐之道時南海太守鮑靚隱迹潛遁人莫之知邁往候之探其至要邁以父母存未忍違親謂餘杭懸雷山近延陵之茅山是洞庭西門潛通五嶽陳安世茅季偉常所游處於是立精舍於懸雷而往來茅嶺之洞室放絕世務以尋仙館朔望時節還家定省而已父母既終乃遣婦孫氏還家遂攜其同志徧遊名山焉初採藥於桐廬縣之桓山餌朮涉三年映欲斷穀以此山近人不得專一乃四面藩之好道之徒

欲相見者登樓與語以此為樂常服氣一氣十餘息永和二年移入臨安西山登巖茹芝眇爾自得終焉之志乃改名元字遠遊與婦書告別著詩十二首論神仙之事焉羲之造之未嘗不彌日忘歸相與為世外之交元遺羲之書云自山陰南至臨安多有金堂玉室仙人芝草左元放之徒漢末諸得道者皆在焉羲之自為之傳述靈異之跡甚多不可詳記元自後莫測所終好道者皆謂之羽化矣

王遜字邵伯魏興人仕郡察孝廉為吏部令史轉殿中將軍累遷上洛太守私牛馬在郡生駒犢者秩滿悉以付官云郡中所產也轉魏興太守惠帝末西南夷叛寧州刺史李毅卒城中百餘人奉毅女固守經年永嘉四年治中毛孟詣京師求刺史不見省孟固陳曰君亡親喪幽閉窮城萬里訴哀不垂愍救既慙包胥無哭秦之感又愧梁妻無崩城之驗存不若亡乞賜臣死朝廷憐之以遜為南夷校尉寧州刺史使於郡使之鎮遜與孟

俱行道遇寇賊踰年乃至外逼李雄內有夷寇吏士散
沒城邑邱墟遜披荒糾厲收聚離散專仗威刑鞭撻殊
俗遜未到州遙舉董聯為秀才建寧功曹周悅謂聯非
才不下版檄遜既到收悅殺之悅弟潛謀殺遜以前建
寧太守趙混子濤代為刺史事覺並誅之又誅豪右不
奉法度者數十家征伐諸夷俘馘千計獲馬及牛羊數
萬餘於是莫不振服威行寧土遣子澄奉表勸進於元
帝帝嘉之累加散騎常侍安南將軍假節校尉刺史如

故賜爵褒中縣公遜以地勢形便上分牂牁為平夷郡
分朱提為南廣郡分建寧為夜郎郡分永昌為梁水郡
又改益州郡為晉寧郡事皆施行先是越雋太守李釗
為李雄所執自蜀逃歸遜復以釗為越雋太守李雄遣
李驤任回攻釗釗自南秦與漢嘉太守王載共距之戰
於溫水釗敗績載遂以二郡附雄後驤等又渡瀘水寇
寧州遜使將軍姚崇囊琛距之戰於堂狼大破驤等崇
追至瀘水赴水死者千餘人崇以道遠不敢渡水遜以

崇不窮追也怒囚羣帥執崇鞭之怒甚髮上衝冠冠為之裂夜中卒遜在州十四年州人復立遜中子堅行州府事詔除堅為南夷校尉寧州刺史假節謚遜曰壯陶侃懼堅不能抗對蜀人太寧末表以零陵太守尹奉為寧州徵堅還京病卒兄澄襲爵歷魏興太守散騎常侍蔡豹字士宣陳留圉城人高祖質漢衛尉左中郎將邕之叔父也祖睦魏尚書父宏陰平太守豹有氣幹歷河南丞長樂清河太守避亂南渡元帝以為振武將軍臨

淮太守遷建威將軍徐州刺史初祖逖為徐州豹為司馬素易豹至是逖為豫州而豹為徐州俱受征討之寄逖甚愧之是時太山太守徐龕與彭城內史劉遐同討反賊周撫於寒山龕將於藥斬撫及論功而遐先之龕怒以太山叛自號安北將軍兖州刺史攻破東莞太守侯史旄而據其塢石虎伐之龕懼求降元帝許焉既而復叛歸石勒勒遣其將王伏都張景等數百騎助龕詔征虜將軍羊鑒武威將軍侯禮臨淮太守劉遐鮮卑段

文鴛等與豹共討之諸將畏悞頓兵下邳不敢前豹欲
進軍鑒固執不許龕遣使請救於勒勒辭以外難而多
求於龕又王伏都等淫其室龕知勒不救且患伏都等
縱暴乃殺之復求降元帝惡其反覆不納敕豹鑒以時
進討鑒及劉遐等並疑憚不相聽從互有表聞故豹久
不得進尚書令刁協奏曰臣等伏思淮北征軍已失不
速今方盛暑冒涉山險山人便弓弩習土俗一人守阨
百夫不當且運漕至難一朝糧乏非復智力所能防禦

也書云寧致人不致於人宜頓兵所在深壁固壘至秋
不了乃進大軍詔曰知難而退誠合兵家之言然小賊
雖狡猾故成擒耳未戰而退先自摧衄亦古之所忌且
邵存已據賊壘威勢既振不可退一步也於是遣治書
御史郝嘏為行臺催攝令進討豹欲徑進鑒執不聽協
又奏免鑒官委豹為前鋒以鑒兵配之降號折衝將軍
以責後効豹進據下城欲以逼龕時石虎屯鉅平將攻
豹豹夜遁退守下邳徐龕襲取豹輜重於檀丘將軍留

寵陸黨力戰死之豹既敗將歸謝罪北中郎將王舒止之曰胡寇方至使君且攝職為百姓障扞賊退謝罪不晚也豹從之元帝聞豹退使收之使者至王舒夜以兵圍豹豹以為他難率麾下擊之聞有詔乃止舒執豹至建康斬之尸於市三日時年五十二豹在徐土內撫將士外懷諸衆甚得遠近情聞其死多悼惜之無子兄子裔字元子散騎常侍兖州刺史高陽鄉侯殷浩北伐使裔率衆出彭城卒於軍

羊鑒字景期太山人也父濟匈奴中郎將兄煒歷太僕
交徐二州刺史鑒為東陽太守累遷太子左衛率時徐
龕反叛司徒王導以鑒是龕州里冠族必能制之請遣
北討鑒深辭才非將帥太尉郗鑒亦表謂鑒非才不宜
妄使導不納疆啟授以征討都督果敗績導以舉鑒非
才請自貶帝不從有司正鑒斬刑元帝詔以鑒太妃外
屬特免死除名久之為少府及王敦反明帝以鑒敦舅
又素相親黨微被嫌責及成帝即位豫討蘓峻以功封

豐城縣侯徙光祿勳卒

劉允字承允東萊掖人漢齊悼惠王肥之後也美姿容
善自任遇交結時豪名著海岱間人士咸慕之舉賢良
辟司空掾並不就會天下大亂攜母欲避地遼東路經
幽州刺史王浚留允表為渤海太守浚敗轉依冀州刺
史邵續續徒衆寡弱謀降於石勒允言於續曰夫田單
包胥齊楚之小吏猶能存已滅之邦全喪敗之國今將
軍伐精銳之衆居全勝之城如何墜將登之功於一簣

委忠信之人於豺狼乎且項羽袁紹非不疆也高祖縞
冠人應如響曹公奉帝而諸侯綏穆何者蓋逆順之理
殊自然之數定也況夷戎醜類也結無賴雖有犬羊之
盛終有庖宰之患而欲託根結援無乃殆哉續曰若如
君言計將安出允曰琅邪王以聖德欽明創基江左中
興之隆可企踵而待今為將軍計者莫若抗大順以激
義士之心奉忠正以厲軍人之志夫機事在密時至難
違存亡廢興在此舉矣續從之乃殺異議者數人遣使

江南朝廷嘉之允仍求自行續厚遣之既至元帝命為丞相叅軍累遷尚書吏部郎允聞石虎攻厭次言於元帝曰北方方鎮皆沒惟餘邵續而已如使復為石虎所制孤義士之心阻歸本之路愚謂宜存救援元帝將遣救之會續已沒而止王敦素與允交甚欽貴之請為右司馬允知敦有不臣之志託疾不視事以是忤敦意出為豫章太守辭以脚疾詔就家授印綬郡人莫鴻南土豪族因亂殺本縣令橫恣無道百姓患之允至誅鴻及

諸豪右界內肅然咸和初為平南軍司加散騎常侍蘇峻作逆溫嶠率衆而下留允等守湓口事平以勲賜爵豐城子俄而代嶠為平南將軍都督江州諸軍事領江州刺史假節允位任轉高矜豪日甚縱酒耽樂不恤政事大殖財貨商販百萬初允之代嶠也遠近皆謂非選陶侃郝鑒咸云允非方伯才朝廷不從或謂王悅曰今大難之後綱紀弛頓自江陵至於建康三千餘里流人萬計布在江州江州國之南藩要害之地而允以侈怙

之性卧而對之不有外憂必有內患悅曰聞溫平南語
家公云連得惡夢思見代者尋云可用劉允此乃溫意
非家公也是時朝廷空罄百官無祿唯資江州運漕而
允商旅繼路以私廢公有司奏免允官書始下而允為
郭默所害年四十九子赤松嗣尚南平公主位至黃門
郎義興太守

桓宣譙國銍人也祖詡義陽太守父弼冠軍長史宣開
濟篤素為元帝丞相舍人時塢主張平自稱豫州刺史

樊雅自號譙郡太守各據一城衆數千人帝以宣信厚
又與平雅同州里轉宣為行叅軍使就平雅平雅遣軍
主簿隨宣詣丞相府受節度帝皆加四品將軍即其所
部使扞禦北方南中郎將王含請宣為叅軍頃之豫州
刺史祖逖出屯蘆州遣叅軍殷乂詣平雅乂意輕平視
其屋云當持作馬廐見大鑊欲鑄作鐵器平曰此是帝
王大鑊天下定後方當用之奈何打破乂曰卿能保頭
不而惜大鑊邪平大怒於坐斬乂阻兵固守歲餘逖攻

平殺之而雅據譙城逖以力弱求助於含含遣宣領兵
五百助逖逖謂宣曰卿先已說平雅信義大著於彼今
復為我說雅雅若降者方相擢用不但免死而已宣復
單馬從兩人詣雅曰祖逖方欲平蕩二寇每倚卿為援
前殷入輕薄非豫州意今若和解則忠勲可立富貴可
保若猶固執東府赫然更遣猛將以卿烏合之衆憑阻
窮城彊賊伺其北國家攻其南萬無一全也願善量之
雅與宣置酒結交遣子隨宣詣逖少日雅便自詣逖

遣雅還撫其衆雅僉謂前數罵辱懼罪不敢降雅復閉城自守逖往攻之復遣宣入說雅雅即斬異已者遂出降未幾石勒別將圍譙城舍又遣宣率衆救逖未至而賊退逖留宣討諸未服皆破之遷譙國內史祖約之棄譙城也宣以牋諫不從由是石勒遂有陳留及約與蘓峻同反宣謂祖智曰今彊胡未滅將勦力以討之而與峻俱反此安得久乎使君若欲為雄霸何不助國討峻威名自舉智等不能用宣欲諫約遣其子戎白約求入

約知宣必諫不聽宣遂距約不與之同邵陵人陳光率
部落數百家降宣宣皆慰撫之約還歷陽宣將數千家
欲南投尋陽營於馬頭山值祖煥欲襲溢口陶侃使毛
寶救之煥遣衆攻宣宣使戎求救於寶寶擊煥破之宣
因投溫嶠嶠以戎為叅軍賊平宣居於武昌戎復為劉
允叅軍郭默害允復以戎為叅軍陶侃討默默遣戎求
救於宣宣偽許之西陽太守鄧嶽武昌太守劉詡皆疑
宣與默同豫州西曹王隨曰宣尚背祖約何緣同郭默

邪嶽謂乃遣隨詣宣以觀之隨謂宣曰明府心雖不爾
無以自明惟有以戎付隨耳宣乃遣戎與隨俱詣陶侃
辟戎為掾上宣為武昌太守尋遷監沔中軍事南中郎
將江夏相石勒荊州刺史郭敬戍襄陽陶侃使其子平
西恭軍斌與宣俱攻樊城拔之竟陵太守李陽又破新
野敬懼遁走宣與陽遂平襄陽侃使宣鎮之以其淮南
部曲立義成郡宣招懷初附勸課農桑簡刑罰略威儀
或載鉏耒於輶軒或親芸獲於隴畝十餘年間石虎再

遣騎攻之宣能得衆心每以寡弱距守論者以為次於
祖逖周訪侃方欲使宣北事中原會侃薨後庾亮為荆
州將謀北伐以宣為都督沔北前鋒征討軍事平北將
軍司州刺史假節鎮襄陽石虎使騎七千渡沔攻之亮
遣司馬王愨期輔國將軍毛寶救宣賊三面為地窟攻
城宣募精勇出其不意殺傷數百多獲鎧馬賊解圍退
走久之宣遣步騎收南陽諸郡百姓沒賊者八千餘人
以歸庾翼代亮欲傾國北討更以宣為都督司雍梁三

州荊州之南陽襄陽新野南鄉四郡軍事梁州刺史持
節將軍如故以前後功封竟陵縣男宣久在襄陽綏撫
僑舊甚有稱績庾翼遷鎮襄陽令宣進伐石虎將李羅
軍次丹水為賊所敗翼怒貶宣為建威將軍使移戍峴
山宣望實俱喪兼以老疾時南蠻校尉王愆期守江陵
以疾求代翼以宣為鎮南將軍南郡太守代愆期宣不
得志未之官發憤卒追贈鎮南將軍戎官至新野太守
宣族子伊字叔夏父景有當世才幹仕至侍中丹陽尹

中領軍護軍將軍長社侯伊有武幹標悟簡率為王濛
劉恢所知頻叅諸府軍事累遷大司馬叅軍時苻堅疆
盛邊鄙多虞朝議選能拒捍疆場者乃授伊淮南太守
以綏御有方進督豫州之十二郡揚州之江西五郡軍
事建威將軍歷陽太守淮南如故與謝元共破賊別將
王鑒張蚝等以功封宣城縣子又進都督豫州諸軍事
西中郎將豫州刺史及苻堅南寇伊與冠軍將軍謝元
輔國將軍謝琰俱破堅於肥水以功封永脩縣侯進號

右將軍賜錢百萬袍表千端伊性謙素雖有大功而終始不替善音樂盡一時之妙為江左第一有蔡邕柯亭笛常自吹之王徽之赴召京師泊舟青溪側素不與徽之相識伊於岸上過船中客稱伊小字曰此桓野王也徽之便令人謂伊曰聞君善吹笛試為我一奏伊是時已貴顯素聞徽之名便下車踞胡牀為作三調弄畢便上車去客主不交一言時謝安女壻王國寶專利無檢行安惡其為人每抑制之及孝武末年嗜酒好內而會

稽王道子昏瞢尤甚惟狎昵讒邪於是國寶諂諛之計稍行於主相之間而好利險詖之徒以安功名盛極而構會之嫌隙遂成帝召伊飲醺安侍坐帝命伊吹笛伊神色無迂即吹為一弄乃放笛云臣於箏分乃不及笛然自足以韻合歌管請以箏歌并請一吹笛人帝善其調達乃敕御妓奏笛伊又云御府人於臣必自不合臣有一奴善相便串帝彌賞其放率乃許召之奴既吹笛伊撫箏而歌怨詩曰為君既不易為臣良獨難忠信事

不顯乃有見疑患周旦佐文武金滕功不刊推心輔王
政二叔反流言聲節忼慨俯仰可觀安泣下沾衿乃越
席而就之將其鬚曰使君於此不凡帝甚有愧色伊在
州十年綏撫荒雜甚得物情桓冲卒遷都督江州荊州
十郡豫州四郡軍事江州刺史將軍如故假節伊到鎮
以邊境無虞宜以寬卹為務乃上疏以江州虛耗加連
歲不登今餘戶有五萬六千宜并合小縣除諸郡逋米
移州還鎮豫章詔令移州尋陽其餘皆聽之伊隨宜拯

撫百姓賴焉在任累年徵拜護軍將軍以右軍府千人
自隨配護軍府卒官贈右將軍加散騎常侍諡曰烈初
伊有馬步鎧六百領豫為表令死乃上之以明欲為國
家輸命而不就也表上詔哀傷之子肅之嗣卒子陵嗣
宋受禪國除伊弟不才亦有將畧討孫恩至冠軍將軍
朱伺字仲文安陸人少為吳牙門將陶丹給使吳平內
徙江夏伺有武勇而訥口不知書為郡將督見鄉里士
大夫揖稱名而已及為將遂以謙恭稱張昌之逆太守

弓欽走灞口伺與同輩郝寶布興合衆討之不克乃與
欽奔武昌後更率部黨攻滅之轉騎部曲督加綏夷都
尉同部曲等以諸縣附昌惟本部唱義討逆逆順有嫌
求別立縣因此遂割安陸東界為灞陽縣而貫焉其後
陳敬作亂陶侃時鎮江夏以伺能水戰曉作舟艦乃遣
作大艦署為左甄據江口摧破敏前鋒敏弟恢稱荊州
刺史在武昌侃率伺及諸軍進討破之敏恢既卒伺以
功封亭侯領騎督時西陽夷賊抄掠江夏太守楊珉每

請督將議拒賊之計伺獨不言珉曰朱將軍何以不言
伺答曰諸人以舌擊賊伺唯以力耳珉又問將軍前後
擊賊何以每得勝邪伺曰兩敵共對唯當忍之彼不能
忍我能忍是以勝耳珉大笑永嘉中石勒破江夏伺與
楊珉走夏口及陶侃來戍夏口伺依之加明威將軍隨
侃討杜弼有殊功語在侃傳夏口之戰伺用鐵面自衛
以弩的射賊大帥數人皆殺之賊挽船上岸於水邊作
陣伺逐水上下以邀之箭中其脛氣色不變諸軍尋至

賊潰追擊之皆棄船投水死者大半賊夜還長沙伺追至蒲圻不及而反加威遠將軍赤幢曲蓋建興中陳聲率諸無賴二千餘家斷江抄掠侃遣伺為督護討聲聲衆雖少伺容之不擊求遣弟詣侃降伺外許之及聲去伺乃遣勁勇要聲弟斬之潛軍襲聲聲正旦並出祭祀飲食伺軍入其門方覺聲將閭晉鄭進皆死戰伺軍人多傷乃還營聲東走保董城伺又率諸軍圍守之遂重柴繞城作高櫓以勁弩下射之又斷其水道城中無水

殺牛飲血閭晉聲婦弟也乃斬聲首出降又以平蜀賊
襲高之功加同廣威將軍竟陵內史時王敦欲用從弟
廩代侃為荊州侃故將鄭攀馬雋等乞侃於敦敦不許
攀等以侃始滅大賊人皆樂附又以廩忌戾難事謀共
距之遂結屯涓口遣使告伺伺外許之而稱疾不赴攀
等遂進距廩既而士衆疑阻復散還橫桑口欲入杜會
時朱軌趙誘李桓率衆將擊之攀等懼誅以司馬孫景
造謀距廩因斬之降軌等廩將西出遣長史劉浚留鎮

揚口壘時杜會請討第五猗於襄陽伺謂廩曰會是猶賊外示西還以疑衆心欲誘引官軍使西然後魚道襲揚口耳宜大部分未可使西廩性矜厲自用兼以伺老怯難信遂西行會等果馳還廩乃遣伺歸裁至壘即為會等所圍劉浚以壘北門危欲令伺守之或說浚云伺與鄭攀同者乃轉守南門賊知之攻其北門時鄭攀黨馬雋等亦來攻壘雋妻子先在壘內或請皮其面以示之伺曰殺其妻子未能解圍但益其怒耳乃止伺常所

調弩忽噤不發伺甚惡之及賊攻陷北門伺被傷退入船初浚開諸船底以木掩之名為船械伺既入賊舉鉞摘伺伺逆接得鉞反以摘賊賊走上船屋大喚云賊帥在此伺從船底沉行五十步乃免遇醫療創小差杜會遣說伺云馬雋等感卿恩妻孥得活盡以卿家內外百口付雋已盡心收視卿可來也伺答曰賊無白首者吾年六十餘不能復與卿作賊吾死當歸南妻子付汝乃還甌山時王廩與李桓社會相持累戰甌山下軍士數

驚喚云賊欲至伺驚創而卒因葬甌山

毛寶字碩真滎陽陽武人也王敦以為臨湘令敦卒為
溫嶠平南叅軍蕪峻作逆嶠將赴難而征西將軍陶侃
懷疑不從嶠屢說不能迴更遣使順侃意曰仁公且守
僕宜先下遣信已一日會寶別使還聞之說嶠曰凡舉
大事當與天下共同衆克在和不可聞有異假令可疑猶
當外示不覺況自作疑邪便宜急遣信改舊書說必應
俱征若不及前信宜更遣使嶠意悟即追信改書侃果

其征峻寶領千人為嶠前鋒俱次茄子浦初嶠以南軍習水峻軍便步欲以所長制之宣令三軍有上岸者死時蘓峻送米萬斛遺祖約約遣司馬桓撫等迎之寶告其衆曰兵法軍令有所不從豈可不上岸邪乃設變力戰悉獲其米虜殺萬計約用大饑嶠嘉其勲上為廬江太守約遣祖煥桓撫等欲襲湓口陶侃將自擊之寶曰義軍恃公公不可動寶請討之侃顧謂坐客曰此年少言可用也乃使寶行先是桓宣背約南屯馬頭山為煥

撫所攻求救於寶寶衆以宣本是約黨疑之宣遣子戎
重請寶即隨戎赴之未至而賊已與宣戰寶軍懸遠而
兵少器仗濫惡大為煥撫所破寶中箭貫髀徹鞍使人
踏鞍拔箭血流滿靴夜奔船所百餘里望星而行到先
哭戰亡將士洗瘡訖夜還救宣寶至宣營而煥撫亦退
寶進攻祖約軍次東關破合肥尋召歸石頭陶侃溫嶠
未能破賊侃欲率衆南還寶謂嶠曰下官能留之乃往
說侃曰公本應領蕪湖為南北勢援前既已下勢不可

還且軍政有進無退非直整齊三軍示衆必死而已亦
謂退無所據終至滅亡往者杜弢非不彊盛公竟滅之
何至於峻獨不可破邪賊亦畏死非皆勇健公可試與
寶兵使上岸斷賊糧運出其不意使賊困蹙若寶不立
效然後公去人心不恨侃然之加寶督護寶燒句容湖
熟積聚峻頗乏食侃遂留不去峻既死匡術以苑城降
侃使寶守南城鄧嶽守西城賊使韓晃攻之寶登城射
殺數十人晃問寶曰君是毛廬江邪寶曰是晃曰君名

壯勇何不出關寶曰君名健將何不入關晃笑而退賊
平封州陵縣開國侯千六百戶庾亮西鎮請為輔國將
軍江夏相督隨義陽二郡鎮上明又進南中郎隨亮討
郭默默平與亮司馬王愆期等救桓宣於章山擊賊將
石遇破之進征虜將軍亮謀北伐上疏解豫州請以授
寶於是詔以寶監揚州之江西諸軍事豫州刺史將軍
如故與西陽太守樊峻以萬餘人守邾城石虎惡之乃
遣其子鑒與其將夔安李萇等五萬人來寇張終渡二

萬騎攻邾城寶求救於亮亮以城固不時遣軍城遂陷
寶峻等率左右突圍出赴江死者六千人寶亦溺死亮
哭之慟因發疾薨詔曰寶之傾敗宜在裁貶然蘇峻之
難致力王室今咎其過故不加贈祭之可也其後公卿
言寶有重勲加死王事不宜奪爵升平三年乃下詔復
本封初寶在武昌軍人有於市買得一白龜長四五寸
養之漸大放諸江中邾城之敗養龜人被鎧持刀自投
於水中如覺墮一石上視之乃先所養白龜長五六尺

送至東岸遂得免焉寶子穆之安之穆之字憲祖小字武生名犯王靖后諱故行字後又以桓溫母名憲乃更稱小字穆之果毅有父風安西將軍庾翼以為叅軍襲爵州陵侯翼等專威陝西以子方之為建武將軍守襄陽方之年少翼選武將可信仗者為輔弼乃以穆之為建武司馬俄而翼薨大將於瓚戴羲等作亂穆之與安西長史江彪司馬朱肱等共平之桓溫代翼復取為叅軍後溫平蜀以功賜次子都鄉侯尋除揚威將軍顗

川太守隨溫平洛入關溫將旋師以謝尚未至留穆之
以二千人衛山陵升平初遷督寧州諸軍事揚威將軍
寧州刺史以桓溫封南郡徙穆之為建安侯復為溫太
尉叅軍加冠軍將軍以所募兵配之溫伐慕容暉使穆
之監鑿鉅野百餘里引汶會於濟川及溫焚舟步歸使
穆之督東燕四郡軍事領東燕太守本官如故袁真以
壽陽叛溫將征之穆之以冠軍領淮南太守守歷陽真
平餘黨分散乃以穆之督揚州之江西軍事復領陳郡

太守俄而徙督揚州之義城荊州五郡雍州之京兆軍事襄陽義城河南三郡太守將軍如故尋進領梁州刺史頃之以疾解職詔以冠軍徵還苻堅別將寇彭城復以將軍假節監江北軍事鎮廣陵遷右將軍宣城内史假節鎮姑熟穆之以為戍在近畿無復軍驚不宜加節上疏辭讓許之苻堅別將圍襄陽詔穆之就上明受桓冲節度冲使穆之游軍沔中穆之始至而朱序陷沒引軍還郡堅衆又寇蜀漢梁州刺史楊亮益州刺史周仲

孫奔退冲使穆之督梁州之三郡軍事右將軍西蠻校尉益州刺史領建平太守假節戍巴郡以子球為梓潼太守穆之與球伐堅至於巴西郡以糧運乏少退屯巴東病卒追贈中軍將軍諡曰烈子珍嗣位至天門太守珍弟璩璩璿璿璿最知名璩字叔璿弱冠右將軍桓豁以為叅軍尋遭父憂服闋為謝安衛將軍叅軍除尚書郎安復請為叅軍轉安子琰征虜司馬合肥之役苻堅迸走璩與田次之共躡堅至中陽不及而歸遷寧朔

將軍淮南太守尋補鎮北將軍譙王恬司馬海陵縣界地名青蒲四面湖澤皆是菰葑逃亡所聚威令不能及璩建議率千人封之時大旱璩因放火菰葑盡然亡戶窘迫悉出詣璩自首近有萬戶皆以補兵朝廷嘉之轉西中郎司馬龍驤將軍譙梁二郡內史尋代郭銓為建威將軍益州刺史安帝初進征虜將軍及桓元篡位遣使加璩散騎常侍左將軍璩執留元使不受命元以桓希為梁州刺史王异據涪郭法成宕渠師寂戎巴郡周

道子成白帝以防之璩傳檄遠近列元罪狀遣巴東太守柳約之建平太守羅述征虜司馬甄季之擊破希等仍率衆次於白帝武陵王令曰益州刺史毛璩忠誠殷亮自桓元萌禍常思躡其後今若平殄兇逆肅清荆郢者便當即授上流之任初璩弟寧州刺史璠卒官璩兄球孫祐之及叅軍費恬以數百人送喪葬江陵會元敗謀奔梁州璩弟瑾子脩之時為元屯騎校尉誘元使入蜀既而脩之與祐之費恬及漢嘉人馮遷共殺元約之

等聞元死進軍到枝江而桓振復攻沒江陵劉毅等還
尋陽約之亦退俄而季之述之皆病約之詣振偽降因
欲襲振事泄被害約之司馬時延祖涪陵太守文處茂
等撫其餘衆保涪陵振遣桓放之為益州屯西陵處茂
距擊破之振死安帝反正詔進璩為征西將軍加散騎
常侍都督益梁秦涼寧五州軍事行宜都寧蜀太守文
處茂輔國將軍西夷校尉巴西梓潼二郡太守又詔西
夷校尉瑾為持節監梁秦二州軍事征虜將軍梁秦二

州刺史畧陽武都太守瑾弟蜀郡太守瑗為輔國將軍
寧州刺史初璩聞振陷江陵率衆赴難使瑾瑗順外江
而下使叅軍譙縱領巴西梓潼二郡軍下涪水當與璩
軍會於巴郡蜀人不樂東征縱因人情思歸於五城水
口反還襲涪害瑾瑾留府長史鄭純之自成都馳使告
璩璩時在畧城去成都四百里遣叅軍王瓊討反者相
距於廣漢犍道令何林聚黨助縱而璩下人受縱誘說
遂共害璩及瑗并子姪之在蜀者一時殄沒璩子弘之

嗣義熙中時廷祖為始康太守上疏訟璩兄弟於是詔
曰故益州刺史璩西夷校尉瑾蜀郡太守瑗勤王忠烈
事乖慮外葬送日近益懷惻愴可皆贈先所授官給錢
三十萬布三百疋論璩討桓元功追封歸鄉公千五百
戶又以祐之斬元功封夷道縣侯自寶至璩三葉擁旄
開國者四人將帥之家與尋陽周氏為輩而人物不及
也瑾子脩之頻歷清顯至右衛將軍從劉裕平姚泓後
為安西司馬沒於魏安之字仲祖亦有武幹累遷撫軍

將軍魏郡太守簡文輔政委以爪牙及登阼安之領兵
從駕使止宿宮中尋拜游擊將軍時庾希入京口朝廷
震動命安之督城門諸軍事孝武即位妖賊盧悚突入
殷廷安之聞難率衆直入雲龍門手自奮擊既而左衛
將軍殷康領軍將軍桓祕等至與安之并力悚因勦滅
遷右衛將軍定后崩領將作大匠卒官追贈光祿勳四
子潭恭邃道潭嗣爵官至江夏相恭歷太傅從事中郎
後軍諮議叅軍與邃俱為會稽王父子所昵乃追論安

之討盧悚勲賜爵平都子命潭襲爵元顯嘗宴泰家既而欲去泰苦留之曰公若遂去當取公脚元顯大怒奮衣而出遂與元顯有隙及元顯敗泰時為冠軍將軍堂邑太山二郡太守遂為游擊將軍遁為太傅主簿桓元得志使泰收元顯送於新亭泰因宿恨手加毆辱俄並為元所殺惟遁被徙廣州義熙初得還至宜都太守德祖璩宗人也父祖並沒於賊中德祖兄弟五人相攜南渡皆有武幹荊州刺史劉道規以祖德為建武將軍始

平太守又徙涪陵太守盧循之役道規又以為叅軍伐徐道覆於始興尋遭母憂劉裕伐司馬休之版補太尉叅軍義陽太守賜爵遷陵縣侯轉南陽太守從劉裕伐姚泓頻攻滎陽扶風南安馮翊數郡所在克捷裕嘉之以為龍驤將軍秦州刺史裕留第二子義真為安西將軍雍州刺史以德祖為中兵叅軍領天水太守從義真還裕以德祖督河東平陽二郡軍事輔國將軍河東太守代劉遵考守蒲坂及河北覆敗德祖全軍而歸裕方

欲蕩平關洛先以德祖督九郡軍事冠軍將軍滎陽京兆太守以前後功賜爵灌陽縣男尋遷督司雍并三州諸軍事冠軍將軍司州刺史戍虎牢為魏所沒德祖次弟巍巍弟辯並有志節巍巍死於盧循之難辯沒於魯宗之之役並奮不顧命為世所歎

劉遐字正長廣平易陽人也性果毅便弓馬開豁勇壯值天下大亂遐為塢主每擊賊率壯士陷堅摧鋒冀方比之張飛關羽鄉人冀州刺史邵續深器之以女妻焉

遂壁於河濟之間賊不敢逼遐間道遣使受元帝節度朝廷嘉之璽書慰勉以為龍驤將軍平原內史建武初元帝令以遐為下邳內史將軍如故初沛人周堅一名撫與同郡周默因天下亂各為塢主以寇抄為事默降祖逖撫怒遂襲殺默以彭城叛石勒遣騎援之詔遐領彭城內史與徐州刺史蔡豹太山太守徐龕共討撫戰於寒山撫敗走詔徙遐為臨淮太守徐龕復反事平以遐為北中郎將兗州刺史太寧初自彭城移屯泗口王

含反遐與蘓峻俱赴京都含敗隨丹陽尹溫嶠追含至
於淮南遐頗放兵虜掠嶠曰天道助順故王含勦絕不
可因亂為亂也遐深自陳而拜謝事平以功封泉陵公
遷散騎常侍監淮北軍事北軍中郎將徐州刺史假節
代王邃鎮淮陰咸和元年卒追贈安北將軍子肇年幼
成帝以徐州授郝鑒以郭默為北中郎將領遐部曲遐
妹夫田防及遐故將史迭卞咸李龍等不樂他屬共立
肇襲遐故位以叛成帝遣郭默等率諸郡討之默等始

上道而臨淮太守劉矯率將士數百襲掩遐營迭等迸走斬田防及督護卞咸等追斬迭龍於下邳傳首詣闕遐母妻子參佐將士悉還建康遐妻驍果有父風遐嘗為石虎所圍妻單將數騎拔遐於萬衆之中及田防等為亂遐妻止之不從乃密起火燒甲仗都盡肇襲爵官至散騎侍郎肇卒子舉嗣卒子遵之嗣卒子伯齡嗣宋受禪國除

鄧嶽字伯山陳郡人也本名岳以犯康帝諱改為嶽後

竟改名爲岱馬少有將帥才略爲王敦叅軍轉從事中郎西陽太守王含構逆獄領兵隨含向京都及含敗獄與周撫俱奔蠻王向蠡後遇赦與撫俱出久之司徒王導命爲從事中郎後復爲西陽太守及蘇峻反平南將軍溫嶠遣獄督護王愆期都陽太守紀睦等率舟軍赴難峻平還郡郭默之殺劉允也大司馬陶侃使獄率西陽之衆討之默平遷督交廣二州軍事建武將軍領平越中郎將廣州刺史假節錄前後功封宜城縣伯咸康

三年嶽遣軍伐夜郎破之加督寧州進征虜將軍遷平
南將軍卒子遐嗣遐字應遠勇力絕人氣蓋當時時人
方之樊噲桓溫以為叅軍數從溫征伐歷冠軍將軍數
郡太守號為名將襄陽城北沔水中有蛟常為人害遐
遂拔劍入水蛟繞其足遐揮劍截蛟數段而出枋頭之
役溫既懷恥忿且忌憚遐之勇果因免遐官尋卒寧康
中追贈廬陵太守嶽弟逸字茂山亦有武幹嶽卒後以
逸監交廣州建威將軍平越中郎將廣州刺史假節

朱序字次倫義陽人也父燾以才幹歷西蠻校尉益州刺史序世為名將累遷鷹揚將軍江夏相興寧末梁州刺史司馬勲反桓溫表序為征討都護往討之以功拜征虜將軍封襄平子太和中遷兖州刺史時長城人錢弘聚黨百餘人藏匿原鄉山以序為中軍司馬吳興太守序至郡討禽之事訖還兖州寧康初拜使持節監沔中諸軍事南中郎將梁州刺史鎮襄陽是歲苻堅遣其將苻丕等率衆圍序序固守賊糧將盡率衆苦攻之初

苻丕之來也序母韓自登城履行謂西北角當先受弊
遂領百餘婢并城中女丁於其角斜築城二十餘丈賊
攻西北角果潰衆便固新築城丕遂引退襄陽人謂此
城為夫人城序累戰破賊人情勞懈又以賊退稱遠疑
未能來守備不謹督護李伯護密與賊相應襄陽遂沒
序陷於苻堅堅殺伯護徇之以其不忠也序欲逃歸潛
至宜陽藏夏揆家堅疑揆收之序乃詣苻暉自首堅嘉
而不問以為尚書太元中苻堅南侵謝石率衆拒之時

堅大兵尚在項苻融以三十萬衆先至堅遣序說謝石稱已兵威序反謂石曰若堅百萬之衆悉到莫可與敵及其未會擊之可以得志於是石遣謝琰選勇士八千人涉肥水挑戰堅衆小却序時在軍後唱云堅敗衆遂大奔序乃得歸拜龍驤將軍琅邪內史轉揚州豫州五郡軍事豫州刺史屯洛陽後丁零翟遼反序遣將軍秦膺童斌與淮泗諸郡共討之又監兖青二州諸軍事二州刺史將軍如故進鎮彭城序求鎮淮陰帝許焉翟遼

又使其子釗寇陳潁序還遣秦膺討釗走之拜征虜將軍表求運江州米十萬斛布五千疋以資軍費詔聽之加都督司雍梁秦四州軍事帝遣廣威將軍河南太守楊佺期南陽太守趙睦各領兵千人隸序序又表求故荊州桓石生府田百頃并穀八萬斛給之仍戍洛陽衛山陵也其後慕容永率衆出洛陽序自河陰北濟與永偽將王次等相遇乃戰於沁水次敗走斬其支將勿支首叅軍趙睦江夏相桓不才追永破之於太行永歸上

黨時楊楷聚衆數千在湖陝聞永敗遣任子諳序乞降
序追永至上黨之白水與永相持二旬聞翟遼欲向金
墉乃還遂攻翟釗於石門遣叅軍趙蕃破翟遼於懷縣
遼宵遁序退次洛陽留鷹揚將軍朱黨戍石門序仍使
子略督護洛城趙蕃為助序還襄陽會稽王道子以序
勝負相補不加褒貶其後東羌校尉竇衝欲入漢川安
定人皇甫釗京兆人周勲等謀納之梁州刺史周瓊失
巴西三郡衆寡力弱告急於序序遣將軍皇甫貞率衆

赴之衝據長安東劍勲散走序以老病累表解職不許
詔斷表遂輒去任數旬歸罪廷尉詔原不問太元十八
年卒贈左將軍散騎常侍

陳壽字承祚巴西安漢人也少好學師事同郡譙周仕
蜀為觀閣令史官人黃皓專弄威權大臣皆曲意附之
壽獨不為之屈由是屢被譴黜遭父喪有疾使婢丸藥
客往見之鄉黨以為貶議及蜀平坐是沉滯者累年司
空張華愛其才以壽雖不遠嫌原情不至貶廢舉為孝

廉除佐著作郎出補陽平令壽撰蜀相諸葛亮集奏之
除著作郎領本郡中正撰魏吳蜀三國志凡六十五篇
時人稱其善叙事有良史之才夏侯湛時著魏書見壽
所作便壞已書而罷張華深善之謂壽曰當以晉書相
付耳其為時所重如此或云丁儀丁廙有盛名於魏壽
謂其子曰可覓千斛米見與當為尊公作佳傳丁不與
之竟不為立傳壽父為馬謖叅軍謖為諸葛亮所誅壽
父亦坐被髡亮子瞻又輕侮壽故壽為亮立傳言亮將

畧非長無應敵之才言瞻惟工書名過其實議者以此少之張華將舉壽為中書郎荀勗忌華而疾壽遂諷吏部遷壽為長廣太守辭母老不就杜預將之鎮復薦之於帝宜補黃散由是授御史治書以母憂去職母遺言令葬洛陽壽遵其志坐不以母歸葬竟被貶議初譙周嘗謂壽曰卿必以才學成名當被損折亦非不幸也宜深慎之壽至此再致廢辱皆如周言後數歲起為太子中庶子未拜元康七年病卒時年六十五梁州大中正

尚書郎范頽等上表曰昔漢武帝詔曰司馬相如病甚可遣悉取其書使者得其遺書言封禪事天子異焉臣等案故治書侍御史陳壽作三國志辭多勸誡明乎得失有益風化雖文豔不及相如而質直過之願垂採錄於是詔下河南尹洛陽令就家寫其書壽又撰古國志五十篇益部耆舊傳十篇餘文章傳於世

王長文字德叡廣漢郾人也少以才學知名而放蕩不羈州府辟命皆不就州辟別駕乃以微服竊出舉州莫

知所之後於成都市中蹲踞齧胡餅刺史知其不屈禮
遣之閉門自守不交人事著書四卷擬易名曰通元經
有文言卦象可用卜筮時人比之揚雄太元同郡馬秀
曰揚雄作太元唯桓譚以為必傳於世未遭陸績元道
遂明長文通元經未遭陸績君山耳太康中蜀土荒饑
開倉賑貸長文居貧貸多後無以償郡縣切責送長文
到州刺史徐幹捨之不謝而去後成都王穎引為江源
令或問前不降志今何為屈長文曰祿以養親非為身

也梁王彤為丞相引為從事中郎在洛出行輒著白旗
小鄣以載車當時異焉後終於洛陽

虞溥字允源高平昌邑人也父祕為偏將軍鎮隴西溥
從父之官專心墳籍時疆場閱武人爭視之溥未嘗寓
目郡察孝廉除郎中補尚書都令史尚書令衛瓘尚書
褚詵並器重之溥謂瓘曰往者金馬啟符大晉應天宜
復先王五等之制以綏長久不可承暴秦之法遂漢魏
之失也瓘曰歷代歎此而終未能改稍遷公車司馬令

除鄱陽內史大修庠序廣招學徒移告屬縣具為條制
於是生徒至者七百人溥乃作誥以獎訓之曰夫聖人
之道淡而寡味故始學者不好也及至暮月所觀彌博
所習彌多日聞所不聞日見所不見然後心開意朗敬
業樂羣忽然不覺大化之陶已至道之入神也故學之
染人甚於丹青丹青吾見其久而渝矣未見久學而渝
者也夫工人之染先脩其質後事其色質脩色積而染
工畢矣學亦有質孝悌忠信是也君子內正其心外脩

其行行有餘力則以學文文質彬彬然後為德夫學者
不患才不及而患志不立故曰希驥之馬亦驥之乘希
顏之徒亦顏之倫也又曰剡而舍之朽木不知剡而不
舍金石可虧斯非其效乎今諸生口誦聖人之典體閑
庠序之訓比及三年可以有成而令名宣流雅譽日新
朋友欽而樂之朝士敬而歎之於是州府交命擇官而
仕不亦美乎若乃含章舒藻揮翰流離稱述世務探蹟
究竒使揚班韜筆仲舒結古亦惟才所居固無常人也

然積一勺以成江河累微塵以崇峻極匪志匪勤理無由濟也諸生若絕人間之務心專親學累一以貫之積漸以進之則亦或遲或速或先或後耳何滯而不通何遠而不至邪時祭酒求更起屋行禮溥曰君子行禮無常處也孔子射於矍相之圃而行禮於大樹之下況今學庭庠序高堂顯敞乎溥為政嚴而不猛風化大行有白鳥集於郡庭注春秋經傳撰江表傳及文章詩賦數十篇卒於洛時年六十三子教過江上江表傳於元帝

詔藏於祕書

司馬彪字紹統高陽睦王之長子也出後宣帝弟敏少篤學不倦然好色薄行為睦所責故不得為嗣雖名出繼實廢之也彪由此不交人事而專精學習故得博覽羣籍終其綴集之務初拜騎都尉泰始中為祕書郎轉丞注莊子作九州春秋以為先王立史官以書時事載善惡以為沮勸撮教世之要也是以春秋不脩則仲尼理之闕睢之亂則師摯脩之前哲豈好煩哉蓋不得已

故也漢氏中興訖於建安忠臣義士亦以昭著而時無良史記述煩雜譙周雖已刪除然猶未盡安順以下亡缺者多彪乃討論衆書紹其所聞起於世祖終於孝獻編年二百錄世十二通綜上下旁貫庶事為紀志傳凡八十篇號曰續漢書泰始初武帝親祠南郊彪上疏定其議上多從之後拜散騎侍郎惠帝末年卒時年六十餘初譙周以司馬遷史記書周秦以上或採俗語百家之言不專據正經周於是作古史考二十五篇皆憑舊

典以糾遷之謬誤彪復以周末盡善也條古史考中凡百二十二事為不當多據汲冢紀年之義亦行於世

王隱字處叔陳郡陳人也世寒素父銓歷陽令少好學有著述之志每私錄晉事及功臣行狀未就而卒隱以儒素自守不交勢援博學多聞受父遺業西都舊事多所諳寃建興中過江丞相軍諮祭酒涿郡祖納雅相知重納好博奕每諫止之納曰聊用忘憂耳隱曰蓋古人遭時則以功達其道不遇則以言達其才故否泰不窮

也當今晉未有書天下大亂舊事蕩滅非凡才能立
君少長五都游宦四方華夷成敗皆在耳目何不述而
裁之應仲遠作風俗通崔子真作政論蔡伯喈作勸學
篇史游作急就章猶行於世便為沒而不朽當同其時
人豈少哉而了無聞皆由無所述作也故君子疾沒世
而無聞易稱自彊不息況國史明乎得失之跡何必博
奕而後忘憂哉納喟然嘆曰非不悅子之道力不足也
乃上疏薦隱元帝以草創務殷未遑史官遂寢不報大

興初典章稍備乃召隱及郭璞俱為著作郎令撰晉史
豫平王敦功賜爵平陵鄉侯時著作郎虞預私撰晉書
而生長東南不知中朝事數訪於隱并借隱所著書竊
寫之所聞漸廣是後更疾隱形於言色預既豪族交結
權貴共為朋黨以斥隱竟以謗免黜歸於家貧無資用
書遂不就乃依征西將軍庾亮於武昌亮供其紙筆書
乃得成詣闕上之隱雖好著述而文辭鄙拙蕪舛不倫
其書次第可觀者皆其父所撰文體混漫義不可解者

隱之作也年七十餘卒於家隱兄瑚字處仲少重武節
成都王穎舉兵向洛以為冠軍叅軍積功累遷游擊將
軍與司隸滿奮河南尹周馥等俱屯大司馬門以衛宮
掖時上官已縱暴瑚與奮等共謀除之反為所害

通志卷一百二十九上